



ITA BANATI TUIR MARIA

Tinan ida ne'e, furak tebes katak loron Pentekoste sei monu iha loron 24 maiu, solenidade Maria Auxiliadora nian; Maria mak feto ne'ebé loke an nafatin ba Maromak nia inspirasaun, nune'e, iha tempu ida ne'e, bele sai modelu oinsá loke an ba Espíritu Santu.

Timor oan sira iha domin boot ba Na'in Feto, maibé ita hakarak tulun oratorianu sira atu hanoin ba Maria nu'udar inan no belun ne'ebé la'o hamutuk ho sira nafatin, nune'e, hanesan iha João Bosco nia mehi, nia bele kaer sira nia liman no akompaña sira iha dalan Maromak nian.

IKONE

Domingos Savio to'o oratoriu iha tinan 1854; iha oratóriu iha foin-sa'e barak ne'ebé badinas no moris ho ksolok, maibé iha mós balun ne'ebé nakar liu, la kohi halo tuir no susar atu estuda. Liu tiha fulan ruma Domingos hato'o ninia ideia ida ba nia belun Giuseppe Bongioanni: tansa foin-sa'e di'ak sira, ne'bé hakarak tulun sira ne'ebé hetan difikuldade, la bele halibur hamutuk hodi hari'i "sosiedade segreda" ida? Giuseppe gosta ideia ida ne'e no sira na'in rua ko'alia ho kolega seluk tan no sira hokotu atu hanaran grupu ida ne'e: "Compagnia" Imakulada nian. Husi verbal ne'ebé sira rasik hakerek bele lee artigu finál: "Konfiansa rohan laek, sinsera, nu'udar oan ba Maria, domin espesial ba Nia, devosaun konstante ba Nia ne'ebé sei tulun atu manán obstakulo hotu, metin iha dezisaun, ezijente ho ita-nia an rasik, hadomi maluk sira no halo di'ak buat hotu." Ho empenhu ida ne'e, sira halibur hamutuk semana-semana atu reza hamutuk no fahe sira-nia esperiénsia oinsá sira tau matan ba foin-sa'e sira grupu rua nian: sira ne'ebé foin to'o iha oratóriu no sira ne'ebé la kohi tuir disiplina, tolokdór no bakudór. Ho grupu dahuluk membru sira hakbesik foin-sa'e ne'ebé foin to'o no karik hatene sira-nia lian de'it hodi halo sira sente sira-nia amizade, akompaña iha atividade oratóriu nian no halo sira "sente uma". Ho grupu daruak, sira sai "anju da guarda", hodi fó hanoin ba maluk sira bainhira sira sala, maibé mós ho atitude "inan" nian, ne'ebé Na'in Feto inspira, sira bele dada foin-sa'e nakar sira ba di'ak. Tanba Dom Bosco haree buat di'ak barak ne'ebé "Compagnia" ida ne'e halo, nia husu ba salesianu sira atu hari'i no promove grupu ida ne'e iha uma hotu ne'ebé sira sei loke.

Pergunta atu halo oratorianu sira reflète:

- ⇒ Domingos Savio hateke ba Maria hodi foti inspirasaun ba ninia atividade no proposta sira: oinsá ha'u-nia domin ba Maria? Keta karik ita reza tersu loron-loron, maibé ita-nia moris la la'o hamutuk ho atitude sira ne'ebé Na'in Feto hatudu iha ninia moris?
- ⇒ Iha ita-nia oratóriu mós, iha labarik/foin-sa'e balun ne'ebé badinas, hala'o atividade ho ksolok, gosta tuir buat ne'ebé propoin, no balun ne'ebé dada an, gosta halo nafatin buat oin seluk, la kohi halo tuir. Oinsá ita bele serbisu hamutuk atu oratorianu hotu bele partisipa ho fuan no laran tomak ba atividade sira? Maria bele hanorin mai ita oinsá halo?

JOGU

Iha Livru Apokalipse (kap. 12) temi Feto ida ne'ebé iha fitun 12 iha ulun: ita sei foti inspirasaun husi pasajen ida ne'e atu hala'o jogu ne'e.

Preparasaun: fahe oratorianu sira ba grupu ho membru 13: ema ida sei halo Na'in Feto, nune'e sei hatais ho batina ka uza hena azul; ema na'in 12 sei halo kabuar hodi haleu nia. Animadór jogu nian presiza reloju atu sara tempu ne'ebé grupu ida-idak gasta atu akompaña Na'in Feto.

Grupu ida sei hamriik iha kampu nia sorin ida, no sira na'in 12 sei kaer liman ba malu hodi halo sira-nia kabuar metin. Ida ne'ebé halo Maria sei hamriik iha klaran; grupu sira seluk hamriik iha sorin seluk. Sira na'in 12 tenke akompaña Na'in Feto husi sorin ida ba sorin seluk (bele la'o, ka halai, konforme saida mak fasíl liu ba sira) hodi impede katak jogadór sira husi grupu seluk (ne'ebé reprezenta dragaun) bele book Nia; katak sira sei la'o ho Maria iha klaran maibé la bele halo jogadór seluk tama iha kabuar laran, ka, ho sira nia liman, biban atu book Na'in Feto. Se oratorianu ida konsege atu book Maria, jogu para, no grupu lakon. Se grupu biban atu akompaña Na'in feto to'o sorin seluk, presiza sura tempu ne'ebé grupu ne'e uza: grupu ne'ebe lori Nia lalais liu mak manán.



SELEBRASAUN: MARIA NO ESPÍRITU SANTU



G: Ohin ita hakarak reza ho Maria hodi hanoin ba prezente sira ne'ebé nia simu husi Espíritu Santu. Espíritu gia ita-nia dalan, tulun ita atu hili buat ne'ebé loos, fô konsolasaun bainhira ita triste no haraik moris mai ita. Na'in Feto mak ema ne'ebé loke an ba prezente Espíritu Santu nian, tan ne'e ita hakarak reza ba Nia atu ita bele sai konxiente kona-ba Espíritu nia prezensa iha ita-nia moris.

Selebrasaun sei fahe ba momentu 7, tuir Espíritu nia prezente sira. Momentu ida-idak sei lee nia título, sei hananu ref: Veni sancte Spiritu, hodi lori simbolu ida ne'ebé reprezenta Espíritu nia prezente, sei lee pasajen ida Evanjellu nian, komentariu badak no sei reza Ave Maria 3, Glória 1 no ref: O Espírito do Senhor renova a face da terra. Aleluia, aleluia

Kantu entrada nian:

MOMENTU I: MARIA, HORIK FATIN SABEDORIA NIAN (prezente sabedoria nian)

Ref: Veni Sancte Spiritu hodi lori simbolu sabedoria nian

L: Lk 1, 28,33

G: Maria iha Maromak nia sabedoria tanba konfia iha Na'i nia projetu, maski nia la komprende. Maromak husu mai ita atu hatán sim, iha ita-nia moris loron-loron nian, hodi tuir santu sira nia ain-fatin.

Ave Maria 3 Glória 1 Ref: O Espírito....

MOMENTU II: MARIA, BEE-MATAN KSOLOK NIAN (prezente matenek nian)

... L: Jo 2,1-5

G: Maria mak matenek, tanba nia komprende akontesimentu sira nia lialoos ho ninia neon, la'ós de'it ho matenek umanu. Loron-loron ita bele hasoru problema no difikuldade sira ne'ebé impede mai ita atu haksolok, maibé ho Maromak nia matenek ita sei haree lialoos.

.....

MOMENTU III: MARIA, INAN BOM KONSELLU NIAN (prezente konsellu nian)

... L: Lk 1,34-38

G: Maria hakfodak iha anju nia oin, maibé, husu tiha pergunta ruma atu bele hatán ho fuan tomak, Nia dehan ninia sim. Atu komprende buat ne'ebé Maromak hakarak husi ita-nia moris, ita presiza fuan ida ne'ebé nakloke no mós kapasidade atu haree Na'i nia sinál sira iha ita-nia moris.

.....

MOMENTU IV: MARIA, MODELU SANTIDADE NIAN (prezente siénsia nian)

... L: Lk 2,15-19

G: Iha pasajen ida ne'e, ita komprende katak "siénsia" la'ós buat ne'ebé bainbain hanoin nu'udar matematika, fisika: iha ne'e bibi-atan sira sai sasin. Tuir ninia sentidu bibliku, siénsia mak kapasidade atu kontempla Maromak Kriadór nia furak no nia kbiit iha ita-nia mundu. Ita mós iha siénsia bainhira ita moris tuir Maromak nia hakaran ho simplisidade.

.....

MOMENTU V: MARIA, INAN MISERICORDIA NIAN (prezente piedade nian)

... L: Act 2,1-4

G: Maria akompaña eskolante sira atu hein Jezús moris hi'as, maski sira halai hotu bainhira Jezús hetan terus. Ita mós presiza komprensaun no solidariedade ba sira ne'ebé ki'ik no fraku liu.

.....

MOMENTU VI: MARIA AUXILIADORA SARANI SIRA NIAN (prezente hamta'uk Maromak nian)

... L: Ap 12,10-18

G: Ho Maria nia tulun, ita presiza aprende moris nu'udar Maromak nia oan sira ne'ebé hamta'uk Maromak nu'udar Aman. Maria sei hatudu dalan mai ita atu bele moris nafatin nu'udar Maromak nia oan sira

.....

MOMENTU VII: MARIA, FATUK NE'EBÉ LA MONU (prezente laran metin nian)

... L: Jo 19,25-27

G: Maria hasoru terus oinoin, maibé hela metin iha Maromak nia Liafuan, la iha buat ida ne'ebé bele halo Nia duvida. Iha ita-nia moris iha buat barak ne'ebé halo ita-nia fiar namlele, maibé hodi hateke ba Maria no santu sira, ita bele aprende atu hala'o buat hotu hamutuk ho Jezús.

.....

Orasaun finál: Maria, Kreda nia inan, tulun ami atu simu Espíritu Santu iha ami-nia laran, hanesan uluk Nia hamahan ita. Tulun ami atu bele hari'i Kreda no sosiedade ho prezente sira ne'ebé Espíritu haraik mai ami. AMEN

Kantu finál

